



## **An tAcht um Theanntáil Feithiclí 2015**

### **An Nós Imeachta Achomhairc**

**Nollaig 2024**

# Clár Ábhar

Leathanach

<b>1. Réamhrá.....</b>	<b>3</b>
<b>2. Gluais Téarmaí.....</b>	<b>3</b>
<b>3. Achomharc Céadchéime a Chur Isteach.....</b>	<b>4</b>
<b>3.1 Achomharc Céadchéime a Chur Isteach chuig an Rialaitheoir Páirceála....</b>	<b>4</b>
<b>3.2 Cinneadh ón Rialaitheoir Páirceála ar Achomharc.....</b>	<b>5</b>
<b>3.3 Taifid.....</b>	<b>6</b>
<b>4. Achomhairc chuig an Oifigeach Achomhairc Teanntála (Achomhairc Dara Céim)</b>	
<b>4.1 Achomharc Dara Céim a Chur Isteach chuig an Oifigeach Achomhairc Teanntála.</b>	<b>7</b>
<b>4.2 An Próiseas Achomhairc Dara Céim.....</b>	<b>8</b>
<b>4.3 Cinneadh ar Achomharc.....</b>	<b>9</b>
<b>4.4 Taifid.....</b>	<b>10</b>

## 1. Réamhrá

Chuir an tÚdarás Náisiúnta Iompair (an tÚdarás) an Nós Imeachta seo i bhfeidhm de réir an Achta um Theanntáil Feithiclí 2015. Ní ghearrtar aon táille as achomharc a chur isteach de réir an Nós Imeachta Achomhairc seo. Mar thoradh ar fheithicil a bheith faoi réir gníomhaíochtaí teanntála (í a chur ó ghluaiseacht nó í a athlonnú), féadfaidh duine achomharc a dhéanamh i gcoinne an chinnidh sin. De réir na reachtaíochta, is ann do phróiseas achomhairc dhá chéim, nach foláir, ar an gcéad dul síos, achomharc a chur isteach chuig an rialaitheoir páirceála (an t-eintiteas a rinne an ghníomhaíocht teanntála). I gcás toradh neamhshásúil ar an achomharc céadchéime, féadfar achomharc dara céim a chur isteach chuig an Údarás lena chinneadh ag Oifigeach Achomhairc Teanntála. Ceaptar Oifigeach Achomhairc Teanntála de réir alt 21 den Acht um Theanntáil Feithiclí 2015. Tá ról an Oifigh Achomhairc Teanntála neamhspleách ar na páirtithe uile le linn dó an fheidhm sin a chomhlíonadh. Rialaítear le hamlínte reachtúla achomhairc chéadchéime agus achomhairc dara céim araon a chur isteach.

## 2. Gluais Téarmaí

ciallaíonn “Acht” [an tAcht um Theanntáil Feithiclí 2015](#);

ciallaíonn “teanntán” feiste nó fearas a dheartar nó a oiriúnaítear ar mhaithe lena daingniú nó lena dhaingniú d’fheithicil chun cosc a chur ar í a thiomáint nó ar í a chur sa siúl ar shlí eile;

ciallaíonn “teanntáil” teanntán a dhaingniú d’fheithicil pháirceáilte;

ciallaíonn “gníomhaíochtaí teanntála” teanntáil, teanntán a bhaint d’fheithicil, feithicil a athlonnú agus muirir a fhorchur;

ciallaíonn “fógra teanntála” fógra a ghreamaítear d’fheithicil de réir alt 13 den Acht;

ciallaíonn “áit teanntála” áit teanntála reachtúil nó áit teanntála neamhreachtúil, nó an dá cheann díobh, de réir mar a bheidh;

ciallaíonn “curtha ó ghluaiseacht” cosc a bheith curtha ar fheithicil gluaiseacht trí theanntán a dhaingniú di;

ciallaíonn “rialaitheoir páirceála”, i ndáil le háit teanntála, an duine atá freagrach, maidir leis an áit teanntála sin, as forfheidhmiú an dlí nó na rialacha is infheidhme maidir le páirceáil san áit sin, ach ní áirítear leis comhalta den Gharda Síochána nó maor tráchta atá údaraithe sa cháil sin;

ciallaíonn “Rialachán” na [Rialacháin um Theanntáil Feithiclí agus um Chomharthaíocht, 2017](#); agus

ciallaíonn “muirear iomchuí” muirear scaoilte teanntáin nó muirear athlonnaithe, nó an dá cheann díobh.

I gcás go n-úsáidtear forainm firinscneach sa doiciméad seo, is féidir leis tagairt freisin don fhorainm baininscneach, agus a mhalairt, de réir mar a bheidh.

### **3. Achomharc Céadchéime a Chur Isteach**

Ceanglaítear ar rialaitheoir páirceála le ceanglas de chuid na reachtaíochta um theanntáil feithicil nósanna imeachta achomhairc teanntála a bheith i bhfeidhm aige. Ní foláir nósanna imeachta den sórt sin a bheith de réir alt 20 den Acht agus ní foláir iad a chur ar fáil i bhfoirm phriontáilte arna iarraidh sin. Ní foláir foráil a dhéanamh do na nithe seo a leanas leis na nósanna imeachta atá i bhfeidhm:

- (a) Forais an achomhairc;
- (b) An duine a bhféadfar an t-achomharc a dhéanamh chuige;
- (c) An fhoirm, lena n-áirítear an fhoirm leictreonach, a bhféadfar an t-achomharc a dhéanamh inti;
- (d) Na doiciméid atá le cur isteach i dteannta achomhairc;
- (e) An tréimhse ama a bhféadfaidh duine achomharc a dhéanamh laistigh di.

Aon duine ar mian leis achomharc a dhéanamh i gcoinne teagmhas gníomhaíochta teanntála a rinneadh i leith feithicil atá faoina húnéireacht nó faoina rialú, ní foláir dó, ar an gcéad dul síos, achomharc a chur isteach chuig an rialaitheoir páirceála lena mbaineann teanntáil na feithicle. Tabharfar mionsonraí faoi nós imeachta achomhairc an rialaitheora páirceála (lena n-áirítear seoladh comhfhreagrais an rialaitheora páirceála) ar an bhfógra teanntála a cheanglaítear a dhaingniú den fheithicil ag an am a dhéantar an ghníomhaíocht teanntála.

#### **3.1 Achomharc Céadchéime a Chur Isteach chuig an Rialaitheoir Páirceála**

Cuirfidh rialaitheoir páirceála cóip de na nósanna imeachta atá i bhfeidhm aige chun achomharc a dhéanamh a chur ar fáil i bhfoirm phriontáilte, arna iarraidh sin.


Maidir le hachomharc chuig an rialaitheoir páirceála, ní foláir –

- É a bheith i scríbhinn agus a chur isteach tríd an bpost, a sheachadadh de lámh ar sheoladh an rialaitheora páirceála nó a sheoladh le ríomhphost nó a chur isteach ar shlí eile ar mhodh leictreonach;
- É a chur isteach tráth nach déanaí ná 60 lá ón dáta a tharla an ghníomhaíocht teanntála a bhfuil achomharc á dhéanamh ina coinne;
- Ainm, seoladh poist iomlán, seoladh ríomhphoist (más ann) agus uimhir theileafóin an duine atá ag déanamh an achomhairc a sholáthar ann;
- Cláruimhir na feithicle lena mbaineann a lua;
- Uimhir thagartha an fhógra teanntála a lua;

- Dáta an teagmhais teanntála a chur ar áireamh;
- Tuairisc leordhóthanach a sholáthar ann ar an láthair inar tharla an teagmhas;
- Forais an achomhairc a lua go soiléir; agus
- Aon doiciméid (e.g. ráitis finné, grianghraif, taifeadtaí físe, ticéid pháirceála, admhálacha páirceála, deimhniú dochtúra, léarscáileanna agus pleananna) a mheasann an duine atá ag déanamh an achomhairc a bheith ábhartha a chur ar áireamh ann. Níor cheart don achomharcóir ach cóipeanna de dhoiciméid den sórt sin a chur isteach toisc gur féidir nach seolfar aighneachtaí ar ais. Ba cheart don achomharcóir na doiciméid bhunaidh uile a choinneáil.

Léirítear sa léaráid thíos gnáthphróiseas achomhairc céadchéime agus áirítear amlínte ceangailteacha reachtúla léi.

### An Próiseas Achomhairc Céadchéime – Achomharc a bheith Curtha Isteach chuig an Rialaitheoir Páirceála



### 3.2 Cinneadh ón Rialaitheoir Páirceála ar Achomharc

Tá oibleagáid ar an rialaitheoir páirceála achomharc a bhreithniú agus fógra i scríbhinn (Litir Chinnidh) ina luafar an toradh a eisiúint chuig an achomharcóir laistigh de 21 lá ón dáta a cuireadh an t-achomharc isteach.

Féadfaidh an rialaitheoir páirceála ceann amháin de na cinntí seo a leanas a dhéanamh –

- Cheadaítear an t-achomharc agus cúlghairtear an cinneadh chun an fheithicil a theanntáil nó a athlonnú;
- Ní cheadaítear an t-achomharc; nó
- Ní cheadaítear an t-achomharc agus deimhnítear an cinneadh ach, trí aird a thabhairt ar na himthosca, déantar cinneadh chun an muirear iomchuí a aisíoc go hiomlán nó go páirteach.

I gcás gurb é an cinneadh ná go gceadaítear an t-achomharc, nó nach gceadaítear an t-achomharc ach go gcinntear an muirear iomchuí a aisíoc go hiomlán nó go páirteach, ní foláir don rialaitheoir páirceála an aisíocaíocht iomchuí a dhéanamh leis an achomharcóir nó leis an duine a d'íoc an muirear, de réir mar is cuí. Ba cheart an íocaíocht sin a dhéanamh ag an am céanna a sheoltar fógra faoi thoradh an achomhairc chuig an achomharcóir.

I gcás gurb é an cinneadh ná nach gceadaítear an t-achomharc, nó nach gceadaítear an t-achomharc ach go ndéantar cinneadh chun aisíocaíocht pháirteach a eisiúint, ní foláir don rialaitheoir páirceála faisnéis leordhóthanach a chur ar áireamh faoi conas a fhéadfar achomharc i gcoinne an chinnidh a dhéanamh chuig Oifigeach Achomhairc Teanntála. Ba cheart an fhaisnéis sin a lua i litir chinnidh an fhógra i scríbhinn (fógra faoi thoradh an achomhairc céadchéime).

### **3.3 Taifid**

Déanfaidh an rialaitheoir páirceála na taifid uile a bhaineann le hachomhairc arna bhfáil ag an rialaitheoir páirceála (achomhairc chéadchéime) a choinneáil ar feadh tréimhse nach lú ná trí bliana ón dáta a cinneadh an t-achomharc. Ní fhéadfar na taifid sin a choinneáil ach amháin i bhfoirm leictreonach.

## ***4. Achomhairc chuig an Oifigeach Achomhairc Teanntála (Achomhairc Dara Céim)***

Féadfaidh duine atá míshásta leis an toradh ar achomharc céadchéime chuig rialaitheoir páirceála achomharc dara céim a dhéanamh chuig an Oifigeach Achomhairc Teanntála tráth nach déanaí ná 30 lá tar éis an cinneadh ón rialaitheoir páirceála a fháil. Ainmníonn an tÚdarás an tOifigeach Achomhairc Teanntála chun achomhairc dara céim a scrúdú agus a chinneadh go neamhspleách.

Comhlíonann an tOifigeach Achomhairc Teanntála a fheidhmeanna go neamhspleách ar fad ón rialaitheoir páirceála agus ón Údarás agus is iad oibleagáidí reachtúla na bpáirtithe lena

mbaineann agus prionsabail na neamhchlaontachta, na cothroime agus na comhsheasmhachta cur chuige a threoraíonn a chuid cinntí agus orduithe.

Ní fhéadfaidh Oifigeach Achomhairc Teanntála déileáil ach amháin le hachomharc ar chinn rialaitheoir páirceála é cheana féin. I ngach cás, tá oibleagáid ar an rialaitheoir páirceála glacadh leis an gcinneadh ó Oifigeach Achomhairc Teanntála.

#### **4.1 Achomharc Dara Céim a Chur Isteach chuig an Oifigeach Achomhairc Teanntála**

Féadfar achomharc dara céim a chur isteach chuig an Údarás Náisiúnta Iompair, a riarann an próiseas achomhairc dara céim. Déanfaidh Oifigeach Achomhairc Teanntála neamhspleách achomharc ag an gcéim sin a chinneadh go neamhchlaonta de réir alt 21 den Acht um Theanntáil Feithiclí 2015. Féadfar achomharc a chur isteach tríd an bhfoirm leictreonach ar líne (ar fáil ag <https://clampingregulation.nationaltransport.ie/Appeal/>) a chomhlánú nó trí fhoirm bhán a iarraidh, rud a fhéadfar a chur isteach, a luaithe atá sí comhlánaithe (i mBéarla nó i nGaeilge), trí ríomhphost chuig [clampingregulation@nationaltransport.ie](mailto:clampingregulation@nationaltransport.ie) nó trí chasadh an phoist chuig:

**An tÚdarás Náisiúnta Iompair, Teach Mhargadh an Fhéir, Margadh na Feirme, Baile Átha Cliath 7, D07 CF98**

Más mian leat comhfhreagras a fháil trí ríomhphost, déan cinnte de go gcuirtear an seoladh ríomhphoist [clampingregulation@nationaltransport.ie](mailto:clampingregulation@nationaltransport.ie) le do leabhar seoltaí chun nach rachaidh comhfhreagras isteach i d'fhillteán ríomhphoist dramhaíola/turscair.

Agus achomharc dara céim á chur isteach lena chinneadh ag Oifigeach Achomhairc Teanntála, **ní foláir cóip den litir chinnidh (fógra faoi thoradh an achomhairc céadchéime) a fuarthas ón rialaitheoir páirceála a chur ar áireamh leis.** Féadfar faisnéis bhreise chun tacú le hachomharc, amhail grianghraif, taifeadtaí físe, ticéid pháirceála, admhálacha páirceála, deimhniú dochtúra, cóipeanna de cheadanna páirceála, léarscáileanna agus pleananna, i measc nithe eile, a chur ar áireamh in aighneachtaí. Níor cheart ach cóipeanna de na doiciméid sin a sheoladh isteach mar chuid d'aighneachtaí. Níor cheart droch-chaint ná caint gháirsiúil a bheith in aighneacht achomhairc. Más gá, is leor tagairt(i) d'úsáid na cainte sin. Ní bheidh cumarsáidí a mbeidh droch-chaint nó caint gháirsiúil iontu mar chuid d'aighneacht achomhairc. I gcás go mbeidh caint den sórt sin iontu, is féidir nach ndéanfar dul chun cinn ar achomharc. Níor cheart cóipeanna de thaifid liachta ná grianghraif de ghnáthaimh liachta nó de dhíobhálacha a chur ar áireamh in aighneacht achomhairc. Is leor deimhniú liachta mar chuid d'aighneacht achomhairc.

Ní ceadmhach faisnéis tacaíochta a thabhairt isteach tríd an bhfoirm ar líne agus trí ríomhphost mar chuid d'aighneacht i scríbhinn ach amháin sna formáidí seo a leanas: JPEG,

GIF, ING, IMG, MP3, MP4, MOV, PDF, PNG, DOCX & MSG. Is ionann an uasmhéid comhaid iomlán agus 50 MB i gcás faisnéis bhreise a fháil tríd an bhfoirm ar líne agus is ionann an uasmhéid agus 35 MB i gcás achomharc i scríbhinn a chur isteach trí ríomhphost. Féadfar glacadh le meáin iniompartha freisin, faoi réir na mbeart frithviris a chuirtear i bhfeidhm. Iarrtar gan comhaid a cheangal le haighneachtaí ríomhphoist agus gan iad a leabú isteach i ríomhphoist. Diúltóidh freastalaí ríomhphoist an Údaráis Náisiúnta Iompair go huathoibríoch do ríomhphoist a gcuimsítear comhaid i bhformáid EXE, DLL nó MSI iontu. Diúltóidh freastalaí ríomhphoist an Údaráis Náisiúnta Iompair freisin do ríomhphoist a gcuimsítear ríomhphoist eile iontu. Ní ghlacfaidh an tÚdarás Náisiúnta Iompair le freagracht as mainneachtain aighneachtaí achomhairc dara céim nach gcloíonn leis na treoirlínte thuas a fháil.

Féachfaidh an Rannán um Rialáil Teanntála Feithiclí le hadmháil fhoirmiúil á lua go bhfuarthas an t-achomharc a eisiúint chuig an achomharcóir laistigh de chúig lá oibre ón achomharc a fháil. Mar sin féin, is féidir go ndéanfaidh an líon aighneachtaí atá á bhfáil ag an am difear don tréimhse ama sin.

## 4.2 An Próiseas Achomhairc Dara Céim

Caithfidh Oifigeach Achomhairc Teanntála le hachomharc dara céim i modh rúin agus breithneoidh sé go hoibiachtúil é. Ní bheidh aird ag an Oifigeach Achomhairc Teanntála ar an gcinneadh ón rialaitheoir páirceála ar an ní. Fiosróidh Oifigeach Achomhairc Teanntála na saincheisteanna iomchuí uile agus na doiciméid uile arna soláthar ag an duine atá ag déanamh an achomhairc (lena n-áirítear aighneachtaí a rinneadh tráth an achomhairc céadchéime). I gcás go meastar é a bheith riachtanach, féadfar cigireacht a dhéanamh ar an láithreán agus/nó féadfar agallaimh a chur ar na pearsana a bhí páirteach sa ghníomhaíocht teanntála a dhéanamh.


Chomh maith leis sin, féadfaidh Oifigeach Achomhairc Teanntála iarraidh ar an achomharcóir faisnéis bhreise nó fianaise bhreise a sholáthar chun tacú le rudaí sonracha a maíodh, mar shampla cóip de chead páirceála do dhaoine faoi mhíchumas. Beidh tréimhse ama shonraithe ann ar cheart an fhaisnéis nó na doiciméid sin a chur isteach laistigh di. Chomh maith leis sin, féadfaidh an tOifigeach Achomhairc Teanntála iarraidh ar an rialaitheoir páirceála faisnéis iomchuí bhreise nó doiciméid iomchuí bhreise a chur isteach laistigh de thréimhse shonraithe chomhchosúil.

Féadfaidh an tOifigeach Achomhairc Teanntála, faoina lánrogha féin, a chinneadh agallamh a chur ar an achomharcóir, ar fhinnéithe nó ar ionadaithe don rialaitheoir páirceála nó don oibritheoir teanntála. Féadfaidh sé a mheas freisin sa chinneadh ar achomharc nach gá gníomh den sórt sin a dhéanamh. Níl aon oibleagáid ar an Oifigeach Achomhairc Teanntála éisteach phearsanta a sholáthar in aon chás. Má theipeann ar cheachtar páirtí iarrataí réasúnacha ón Oifigeach Achomhairc Teanntála a chomhlíonadh, is féidir go ndéanfar difear diúltach don chinneadh ar achomharc.



Le linn dó achomhairc a bhreithniú, féadfaidh Oifigeach Achomhairc Teanntála aird a thabhairt ar aon teagmhais roimhe ina ndearnadh achomhairc a bhain le háit teanntála ar leith, leis an rialaitheoir páirceála, leis an oibritheoir teanntála nó leis an achomharcóir, nó ar nithe eile den sórt sin, má mheasann sé go bhfuil siad ábhartha don achomharc atá á bhreithniú. In amanna, féadfaidh beirt Oifigeach Achomhairc Teanntála nó níos mó achomhairc a chinneadh i gcomhpháirt.

### An Próiseas Achomhairc Dara Céim – Achomharc a bheith Curtha Isteach chuig Oifigeach Achomhairc Teanntála



### 4.3 Cinneadh ar Achomharc

Ar an achomharc agus aon fhaisnéis iarrtha bhreise agus/nó doiciméid iarrtha bhreise a fháil, breithneoidh Oifigeach Achomhairc Teanntála an ní agus déanfaidh sé an cinneadh uaidh i scríbhinn (i gcóip chrua nó i bhfoirm leictreonach nó i gcóip chrua agus i bhfoirm leictreonach araon). Eiseofar an cinneadh i dteannta na gcúiseanna ar thángthas ar an gcinneadh sin agus pléifear ann gach ceann d'fhorais shubstainteacha an achomhairc. Sa chuid is mó de chásanna, cuirfear an cinneadh ar aghaidh chuig an achomharcóir agus chuig an rialaitheoir páirceála araon laistigh de 60 lá ón dáta a fuair an tÚdarás achomharc. I gcás go gcuirfear cosc, de bharr imthosca nach raibh coinne leo, ar achomharc a réiteach laistigh den tréimhse ama 60 lá, cuirfidh an tÚdarás mionsonraí faoi amlíne leasaithe ar aghaidh.

Déanfaidh an tOifigeach Achomhairc Teanntála ceann amháin de na cinntí seo a leanas:

- Ní cheadaítear an t-achomharc, agus deimhnítear an cinneadh is ábhar don achomharc, nó
- Cheadaítear an t-achomharc agus cúlghairtear an cinneadh chun an fheithicil a theanntáil nó a athlonnú.

Chomh maith leis sin, féadfaidh an tOifigeach Achomhairc Teanntála ordú a dhéanamh maidir le costais a d'fhéadfadh sé a mheas a bheith cuí sna himthosca. Ní bhreithneofar ordú den sórt sin ach amháin i gcás gur thabhaigh achomharcóir caiteachas mar thoradh ar fheithicil a bheith faoi réir gníomhaíochtaí teanntála.

I gcás gurb é an cinneadh ná go gceadaítear an t-achomharc, ní foláir don rialaitheoir páirceála an aisíocaíocht iomchuí a dhéanamh leis an achomharcóir tráth nach déanaí ná 14 lá tar éis an dáta a cuireadh an cinneadh ar aghaidh chuig an dá pháirtí. Ní fhéadfar aon táille riaracháin ná aon asbhaint eile a chur i bhfeidhm maidir leis an méid arna aisíoc.

I gcás go ndearna an tOifigeach Achomhairc Teanntála ordú maidir le costais, tá an t-ordú sin le comhlíonadh ag an bpáirtí iomchuí nó ag na páirtithe iomchuí tráth nach déanaí ná 14 lá tar éis an cinneadh a dhéanamh nó laistigh de thréimhse eile den sórt sin a fhéadfaidh an tOifigeach Achomhairc Teanntála a leagan amach san ordú uaidh.

Ní fhéadfaidh an tOifigeach Achomhairc Teanntála achomharc i gcoinne teanntála nó athlonnaithe a éisteacht i gcás gur tionscnaíodh imeachtaí cúirte mar gheall ar pháirceáil neamhdhleathach go dtí go mbeidh na himeachtaí tarraingthe siar nó tugtha chun críche. Más rud é go n-éistear na himeachtaí sin ach go ndíbhtear iad nó nach n-éiríonn leo, ní foláir an muirear iomchuí a aisíoc.

Is é an cinneadh ó Oifigeach Achomhairc Teanntála ar achomharc an chuid deiridh den phróiseas achomhairc. Níl aon deis bhreise achomhairc ann de réir an Nós Imeachta seo. Ní gnách go ndéanann an tÚdarás comhfhreagras breise le ceachtar páirtí tar éis fógra a thabhairt faoin gcinneadh ar achomharc.

Ní chuireann an cinneadh ar achomharc cosc ar aon pháirtí a chearta reachtúla a fheidhmiú agus leas a bhaint as an gcóras cúirteanna. Mura bhfuil tú sásta leis an bhfreagra ón Údarás maidir le hachomharc, is féidir leat gearán a dhéanamh le [hOifig an Ombudsman](#).

#### 4.4 Taifid

Déanfaidh an tÚdarás na taifid uile a bhaineann le hachomhairc dara céim arna bhfáil a choinneáil ar feadh tréimhse nach lú ná trí bliana ón dáta a cinneadh an t-achomharc. Ní fhéadfar na taifid sin a choinneáil ach amháin i bhfoirm leictreonach.